

## IV. PIKÁNAN KONTRA SPIRITU SANTU

Nos a studia e naturalesa di e di tres miembro di e Trinidad, Su identidat i Su obranan. Ma tin un otro punto negativo ku nos no por ignorá. Hende por peka kontra Spiritu Santu. Nos ke studia esaki pa nos por evitá di ofendé e Spiritu Santu presioso. Pues e pregunta ku nos tin ku hasi ta kon hende por peka kontra Spiritu Santu?

### A. RESISTÍ

Nèt promé ku Esteban a wòrdu piedrá, el a prediká, “*Boso, hòmbènan kabesura i insirkumsidá di kurason i orea, semper ta resistí Spiritu Santu; boso ta hasi meskos ku boso tatanan a hasi*” (Echunan 7:51). E palabra “*resistí*” ta e palabra griego ANTIPIPTO, ku ta nifiká pa bringa kontra, pa resistí, pa oponé kontra.

Ku amor Spiritu Santu ta bati na porta di kurason di e persona sin Kristu. Ma e persona ta skohe pa oponé kontra Su petishon grasioso. Maske e argumentonan ta visto i e faktonan ta kla kla, tòg e persona boluntariamente ta rechasá e evidencia i ta nenga di konfia den Hesu-Kristu komo Salvador.

Esei tabata e reakshon den Echunan 7:51-60. Esnan ku a skucha Esteban su predikashi a rechasá Spiritu Santu Su batimentu na porta di nan kurason via di Esteban.

Gènesis 6:3 ta indiká ku dia por yega ku Spiritu Santu ta stop di bati na porta di kurason di esun ku ta resistí: “*E ora ei SEÑOR a bisa: ‘Mi Spiritu lo no lucha ku hende pa semper...’*”

Esaki mester ta un aviso solemne pa un persona sin Kristu. E por resistí, resistí, resistí, te porfin Spiritu Santu ta stòp di bati na porta di su kurason, i e persona no keda den su kondishon spiritual i ta bai pèrdí!

### B. INSULTÁ

Hebreonan 10:29 ta mensioná un otro piká: “*Kuantu mas pisá bo ta kere ku e kastigu mester ta pa esun ku a trapa e Yu di Dios bou di su pia, i ku a konsiderá impuru e sanger di e aliansa, pa medio di kual el a wòrdu santifiká, i a insultá e Spiritu di gracia?*” Esaki ta e palabra griego, ENUBRISO ku ta nifiká, pa trata ku despresio, pa trata na un manera insultante òf ofensivo.

Spiritu Santu ta ofresé pordon na e pekadó pa medio di e redenshon ku Hesu-Kristu a proveé. Ora e pekadó ta rechasá testimonio di Spiritu Santu, ta komo sifuera e ta yama Spiritu Santu un gañadó, ta tuma e morto di Hesu-Kristu komo algu sin balor, rechasando Su morto komo Dios Su úniko provishon pa salbashon di e pekadó. Esaki ta insultá Spiritu Santu.

Ta parse ku esaki tambe ta un piká ku hende sin Kristu ta hasi.

### C. BLASFEMÁ

Hopi kristian ta preokupá ku talbes nan a kometé e piká aki. Ta parse ku e piká aki kontra Spiritu Santu ta entre un di e pikánan mas serio, pasobra no tin pordon pa e piká aki!

Nos a yega di elaborá riba e piká aki na un forma mas ekstensivo den e dokumento entitulá *E Piká Inpordonabel*—e dokumento ku ta sigui despues. No keda sin les’é. Nos lo resumí en korto aki.

1. Kiko ta e piká? E ta e rechazo boluntario, konsiente i final pa ku e obra di Spiritu Santu pa trese e persona na salbashon. E lídernan religioso hudu a hasi un desishon konsiente i boluntario pa rechasá tur e evidencia ku Hesus ta Mesias pa nan por evitá di kere den djE (Mateo 12:31-32).

2. Kiko ta e konsekuensianan di e piká? a) Dios ta laga e persona pa su kuenta. b) E hende su kurason ta bira duru. c) Ta bira imposibel pa e persona repintí. d) Ta bira imposibel pa e persona konfia den Kristu. e) Pues, ta bira imposibel pa e persona wòrdu pordoná. Di bèrdat,

e no ta deseá pordon mes! Esaki ta un piká ku hende sin Kristu so por hasi.

#### **D. PROBA**

Echunan 5:1-11 ta konta e storia tokante Ananias i Safira. Nan a pretendé ku nan a bende nan tereno i a duna na Dios tur e sèn ku nan a haña for di benta di e tereno. Ma en realidat, nan a keda ku un parti di e plaka pa nan mes. Den 5:9, Pedro a hasi Safira, esposa di defunto Ananias, pregunta, “*Pakiko boso a kumbini ku otro pa pone Spiritu di Señor na prueba?*”

Nan a pone Spiritu Santu na prueba dor di purba gañE. “*Ma Pedro a bisa: ‘Ananias, pakiko Satanás a yen abo kurason pa gaña Spiritu Santu, i pa tene algu atras di e plaka di e tereno?’*” (5:3).

Esaki ta un piká ku kreyentenan por hasi. Talbes un ehèmpel ku mi a yega di opservá por yuda nos komprendé. Mi tabata un hòben na un skol kristian na Canada tempu ku Dios a obra na un manera spesial. Hopi alumno a konfesá piká i a dediká nan bida na Dios. Durante e dianan ei, esei tabata e kos popular pa hasi. Tabata un tentashon pa hòbennan duna impreshon ku nan a dediká nan mes na Señor—maske den nan kurason nan tabata sa wèl bon ku nan ta tene algu atras pa nan mes—méskos ku Ananias i Safira. Nos por purba hunga e “wega” aki ku Dios, ma Dios no ta hasi wega...manera ta visto den e storia di Ananias i Safira.

#### **E. PAGA**

Un otro piká ku un kreyente por kometé kontra Spiritu Santu sensibel segun 1 Tesalonisensenan 5:19 ta “*paga e Spirtu.*” Ta parse ku e idea di “*paga*” tin di hasi ku kandela. Mateo 12:20 ta bisa “*...un mecha ku ta sende flou, E lo no paga...*”. Efesionan 6:16 ta laga sa ku “*...boso lo por paga tur e flechanan sendí di e malbado*”. Hebreonan 11:34 ta menshoná “*...paga poder di kandela...*”

Ora un kreyente ta paga Spiritu Santu, e ta stroba Spiritu Santu di obra, ta tene Spiritu Santu abou i no ta pèmití E pa hasi Su obra den e kreyente. Un manera fásil pa bisa esaki ta, pa bisa Spiritu Santu “*Nò!*” Pa nenga laga Spiritu Santu hasi loke E ta deseá pa hasi. Esaki ta rebelion i kapricho den kurason di e kristian, bisando Spiritu Santu, “*mi boluntat, no di Bo sosodé.*” Esei sigur ta paga Spiritu Santu. Kuidou pa no paga e kandela di Spiritu Santu den bo bida te ku solamente shinishi so ta sobra. Shinishi ta indiká ku antes tabatin kandela, ma awor e kandela a paga!

Ta parse ku ta pusibel pa paga Spiritu Santu den bida di otronan tambe. Kon esei por sosodé? Dor di instigá rebelion den kurason di otro krisitan pa ku e bos di Spiritu Santu. Talbes e kreyente por ta kulpabel di hasi esaki dor di kritiká e obra di Spiritu Santu den bida di otro hende, kritikando su testimonio, kritikando un mensahe ku Dios a usa pa papia kun’é.

#### **F. HASI TRISTU**

Dos teksto ta papia tokante e piká di hasi Spiritu Santu tristu. Efesionan 4:30 ta bisa, “*I no hasi Spiritu Santu di Dios tristu, pa medio di Kende boso a wòrdu seyá pa e dia di redenshon.*” Tambe Isaias 63:10 ta bisa, “*Ma nan a rebeldiá i a hasi Su Spiritu Santu tristu; pesei, pa nan El a kambia bira nan enemigu; El a bringa ku nan.*”

##### **1. E posibilidat pa e kreyente hasi Spiritu Santu tristu**

Ta maraviyoso ku Dios ta respetá e libertat di hende. E no ta obligá e inkomberso pa wòrdu salbá, ni E no ta forsa e kreyente pa madurá i krese den santidat—maske tur dos ta Dios Su dese ferviente. Na lugá di obligá hende, E ta duna hende e libertat pa skohe.

Ki un responsabilidat grandi pa e kreyente no hasi Su Spiritu Santu tristu dor di no reakshoná positivo pa ku Su bondat! E echu ku e kristian por hasi Spiritu Santu tristu, ta indiká ku Spiritu Santu ta stima e kreyente. Si E no a stima nos, lo no ta posibel pa hasiE tristu.

##### **2. Kon e kreyente por hasi Spiritu Santu tristu**

Efesionan 4:30 mes no ta duna indikashon kla kiko ta hasi Spiritu Santu tristu. Pero e teksto aki por wòrdu hañá den e konteksto di Efesionan 4:20-5:18, i e teksto aki ta trata ku diferente piká. Ta klaro ku piká ta hasi e presioso Spiritu Santu tristu.

Ma talbes ta posibel pa ta mas spesifiko—kua pikánan en partikular ta hasiE tristu. Nos no por bisa esaki ku tur siguransa, ma ta notabel ku Efesionan 4:30 ta aparsé nèt meimei di dos versíkulo ku tin di hasi ku loke e kristian ta papia. Esaki ta duna indikashon ku kreyentenan por hasi Spiritu Santu tristu ku nos palabranan!

3. Konsekuensianan ora e kreyente ta hasi Spiritu Santu tristu

Nos por bisa ku siguransa ku Spiritu Santu no ta apartá for di e kristian. Nos ya kaba a mira ku Spiritu Santu ta habitá den e kreyente pa semper (Juan 14:16). Ma ta un echo ku e kreyente por pèrdè e privilegionan di komunjon ku Dios. Piká ta pone un barera entre Dios i nos. Alegria ta desparesé. Poder den bida i ministerio ta hasi falta. Orashon no ta yega mas leu ku plafon. Spiritu Santu Su obra den bo bida ta para ketu—pasobra E tin ku trata ku e piká den bo bida promé ku E por sigui obra den bo bida.

I Isaias 63:10 ta duna un atvertensia serio pa no hasi e piká aki: “...*El a kambia bira nan enemigu; El a bringa ku nan.*”

## LITERATURA KONSULTÁ

Berkhof, Louis. *Systematic Theology* (Grand Rapids: William B. Eerdmans Publishing Company, copyright 1939, 1941, reprinted, October 1984).

Chafer, Lewis Sperry, revised by Walvoord, John F. *Major Bible Themes*. Grand Rapids: Zondervan Publishing House, 1974.

Erickson, Millard J. *Christian Theology*. Grand Rapids: Baker Book House, 1987, p. 856-883.

Evans, William. *The Great Doctrines of the Bible*. Chicago: Moody Press, 1912, 1949.

Hodge, Charles. *Systematic Theology* (Grand Rapids: William B. Eerdmans Publishing Company, 1986), vol. 1.

Pache, René, *The Person and Work of the Holy Spirit* (Chicago: Moody Press, 1954).

Ryrie, Charles C. *Basic Theology* (Colorado Springs: Chariot Victor Publishing, 1999).

Strong, Augustus H. *Systematic Theology*. Old Tappan; Fleming H. Revell Company, 1907, 1979.

Thiessen, Henry C. *Lectures in systematic Theology*, Grand Rapids: William B. Eerdmans Publishing Company, 1949, 1979.

Torrey, R. A., *The Person & Work of the Holy Spirit* (New Kensington, PA: Whitaker House, 1996).